

**Uunga siunnersuut: Akileraaruserinermik ingerlatsineq pillugu Inatsisartut inatsisaata allanngortinneqarneranik Inatsisartut inatsisaat nr. xx, xx 2014-imeersoq**

(Nammineerluni nalunaarsuut kingusinaartumik nassiunneqartillugu akileraarutissanut qaffaassutissap allanngortinneqarnera. Akileraarutit pillugit paasissutissanik nunallu allat paarlaateqatigiittarnissaq.)

**Saqqummiussissut**

(Aningaasaqarnermut Nunamullu Namminermut Naalakkersuisoq)

Naalakkersuisut matumuuna saqqummiuppaat akileraaruserinermik ingerlatsineq pillugu Inatsisartut inatsisaata allanngortinneqarnissaanik Inatsisartut inatsisissaannut siunnersuut.

Siunnersuuteqarnikkut allanngortinneqassaaq akileraarutininut qaffaassutissaq kingusinaartumik nammineerluni nalunaarsuummik tunniussisoqartillugu. Procentiliilluni maannakkut qaffaasarneq allanngortillugu, nammineerluni nalunaarsuiffimmik nassiussinissamut piffissaliussap ullormik ataatsimik qimmorneqarneri tamaasa akileraarutissanut qaffaassutissap aalajangersimasumik 200 kr.-iunissaa, taamaattorli inunnut annerpaamik 2.000 kr.-iunissaa, aammalu namminersorlutik inuussu-tissarsiuutinik ingerlataqartunut aamma inatsisit naapertorlugit inuttut isigineqarsinnaasunut anner-paamik 5.000 kr.-iunissaa siunnersuutaavoq.

Allanngortitsinermit tamassumunnga tunngaviuvoq paasineqarmat, maana aaqquissuussineq atuutoq nammineerluni nalunaarsuiffimmik tunniussinissamut piffissaliussamik eqquutsitsinissamut naammattumik pilerinarsaatitaqannginnera. Ullumikkut nammineerluni nalunaarsuisussaataasut aningaasarsianik akileraaruteqaataasussanik minusimik inernilinnik aningaasarsiaqartut nammineerluni nalunaarsuiffimmik nassiussinissamut piffissaliussamik qimmuisut akilertagaat tassatuaavoq qaffaat 100 kr.-iusoq erniaalu. Erniat inatsisit naapertorlugit inuttut isigineqarsinnaasunut tunngatillugu 6 kr.-iupput inunnullu 8 kr.-iullutik.

Pisussaaffimmik eqqortitsisannginnerup aamma kingunerisarpaa malunnaatilimmik allaffissor-nikkut suliaqarnerulerneq, inuiaqatigiinnut aningaasartuutinik kinguneqarttitsartumik.

Aammattaaq siunnersuutaavoq paasissutissanik paarlaateqatigiissinnaaneq annertusillugu nunat sumiiffiillu allat Kalaallit Nunaata isumaqatigiissuteqarfigisai ilanngunneqassasut. Annertusisitsinissaq nunarsuarmi qanilliarernerup, aammalu Kalaallit Nunaanni inuit selskabillu il.il. pillugit paasissutissat akileraartarnermi soqutiginaatillit amerliartuinnartut nunani allani aningaaserivinni pigineqarnerisa kinguneraat.

Siunnersuuteqarnermi pingaarnertut siunertaavoq nunani allani aningaasanik pisuussutunik toqqorsinikkut akileraanngitsoorniarsinnaanerup pinaveersimatinniarnissaa.

Taamaattumik akileraaruserinermik ingerlatsineq pillugu inatsimmi § 35 a-mik nutaamik ilanngusisooqarnissaa siunnersuutigineqarpoq, tamaalilluni Naalakkersuisut allaffissornikkut malittari-sassiorsinnaanermut piginnaatinneqalissapput nunanik assigiinngitsunik akileraartarnermut paasissutissanik paarlaateqatigiittalernissaq siunertaralugu. Paasissutissanik paarlaateqatigiittarnissaq pisinnaalissaaq nunanik assigiinngitsunik isumaqatigiissutit tunuliaqutaralugit.

Suli isumaqatigiisummik taamaattumik isumaqatigiittoqarsimannginnera erseqqissarneqassaaq kisianni maanna USA-mik oqaloqateqartarnej ingerlanneqarpoq FATCA isumaqatigiisummik taasamik isumaqatigiissuteqarnissaq siunertaralugu. Aammattaaq naatsorsuutigineqarpoq ukiuni tulliuttuni nunanik assigiinngitsunik akileraartarnej pillugu assingusunik isumaqatigiissuteqartalernissaq.

Taamatut oqaaseqarlunga siunnersuut Inatsisartunut suliarilluarneqaqqullugu ingerlatippara inassutissallugulu Inatsisartuni aappassaaneerneqannginnermini Aningaasaqarnermut Akileraartarnermullu Ataatsimiititaliami suliarineqaqqaassasoq.